

# Birdaexr Sul Vaexr Beil Ber

## 1

<sup>1</sup> Ngo mel Yisu Zidu miardal dae ca Birdaexr ddei nga a. Berdu mermi, Jialataexl mermi, Jiapaxldojia mermi, Yalxilyal mermi nei Bixltuinixr mermi ngolhher dae Yisu leil ddarzzi su ca, hherdder Arbosobo tiur har dae cassor-worssor mel, ngo nia leil xil vaexr gger. <sup>2</sup> Arbbor Arbosobo mel yar saexl zaxr dae mel dax zox dae a, nia leil tiur teixl lei a, nia leil yar ddei Xiu ddei leil koxl dae a, zuixl nr zza lol, seirceix-seirmaer loxr lol. Yar eine bei a mel nia leil Yisu Zidu ddei ddar no lol a, Yisu Zidu ddei sirnilni mel nia leil cir xia gger lol niazzir a nga arddeir a.

Arbosobo leil nia leil cirza-hanga daxlgaxl-daxllixl meixl gger lol nia, nia leil nixmox zzaso lol nia!

### Cirse-Cirsil Gol Dae Loxia

<sup>3</sup> Seirpor Yisu Zidu Yarbbor Arbosobo leil mel bbeix zae gger nia! Yar mel niul leil yarzi sael zoxlnixr a, yar dder Yisu Zidu si a yoxl gol du xixl lei eil ddei leil ngol dae a, niul leil olga sixl ar ddei gger a. Yel niul saexl, niul mel cirse-cirsil gol dae cexr, <sup>4</sup> halae Arbosobo niul leil merhhexr gga cirza-hanga seirseir bei har zaxr gger dae hal mel li wo ddo.

Cirza-hanga seirseir hal mel mel xiaxr nr var, naex nr var, mier nr var.

<sup>5</sup> Nia mel Arbosobo leil ddarzzi a, Arbosobo dder ddoddomo bei a nia leil guaxr dae a. Nixixl maelele ddei gga ci a mel, nia Yisu Zidu cirza-hanga leil jiuxl ggie mia ddo a; <sup>6</sup> yel nia ggese nia. Eilcar a nia ciryoxr-hanga goxr sol pex dae a, arleixr goxr sol nia bbeixarnar, <sup>7</sup> nael nia goxr sol eil mel pex dae a mel dder nia nixmox zzar Yisu Zidu leil vever a ddarzzizzi dae bbe saexl ddo a. Piu-sae mel adoxl cu goxr a lei, halae bei xiaxr ddo, nael nia nixmox zzar Yisu Zidu leil vever a ddarzzi dae a mel bir piu sae

leil hormo perniar leixl. Nia eil mel pex dae ho a mel, Yisu Zidu jjixr lei car dder nia leil kuar gger var, nia leil middux lol var, halae nia leil i du var.<sup>8-9</sup> Nia mel Yisu leil mia nr seix bbeixarnar, nael halae yar leil perniar. Eilleix yar leil mia nr ddo bbeixarnar, nael halae yar leil ddarzzi. Nia yar leil ddarzzi a, nia ddei xiu ddei leil mel jiuxl wo a; yel nia meir ddei gga biar teixl lei nr xie bbeixarnar, nixmox zzar mel ggese zildu a.

<sup>10</sup> Yisu Zidu nia leil jiuxl eil ddei leil bbeix ci a mel, xiezi mel arddol-cirsil dder bbeix har zaxr goxr ho a. Arbosobo nia leil cirza-hanga seirseir meixl gger eil mel lei xiezi mel zabbar seirseir a Arbosobo leil biex goxr ho a; zabbar seirseir a zza goxr ho a.<sup>11</sup> Zidu ddei Xiu ddei mel xiezi mel nixmox zzar hher ji dae a, yaa leil Zidu mel goxrsol-goxrnaxr cirke goxr nia, eil mel goxr jixr ho a yar middux eine saexl zaxr lol. Yel yaa dder eil mel arddolcar nga var, halae eil mel arsae nga bbe i.<sup>12</sup> Arbosobo xiezi mel leil saexl lol, yaa ddar eil mel biar a mel, armael leil weix a biar nr nga a nei, nia leil weix a biar arddeir a. Xiezi halleix biar goxr ddar mel mel hherdder eilleix Yisu Zidu ddei ddar seirseir biar su ca mel nia leil biar gger ddar mel nga a. Yaa merhhexr gga zei lei Arbosobo ddei Xiu ddei leil koxl dae a, nia leil biar gger arddeir a. Tisir mel lei yaa biar dae eil mel leil saexl niazzir.

### **Seirceix-Seirmaer Loxr Nia**

<sup>13</sup> Yel nia nixmox zzar bei har zaxr dae nia, armael leil guaxr ssei xie nia. Nia Yisu Zidu jjixr lei car a, nia leil seirseir meixl gger dae mel leil li wo loxia nia.<sup>14</sup> Halleix nia Yisu leil nr saexl seir car a, nia yarzi medeil azo nr seir bei niazzir dder azo nr seir bei. Nael eilboxl, nia Arbosobo ddei ddar no a anix yarzi gayo mel sael a nga, yel halleix sael a bei nr ddo.<sup>15</sup> Nia leil tiur teixl lei su Arbosobo mel seirceix-seirmaer, yel nia azo bei lei seirceix-seirmaer bei nia.<sup>16</sup> Arbosobo Ddei Sul ber leil Arbosobo bbeix: “Ngo mel seirceix-seirmaer, yel nia lei

seirceix-seirmaer eine nga nia.”

<sup>17</sup> Arbosobo mel ca nr i. Yar halae ca mel bei dae mel dax zox dae a, bbaehhexhhexmo yaa leil ser. Yel nia Arbosobo dax ddar biar a, yar leil Arbbor ae a mel, nia middurbbor ngolhher dae car a dder yar leil i du nia, yar leil gexr nia. <sup>18-19</sup> Nia lei saexl, nia nixixl goxr a, nia ddei porpor mel sael a nr goxr. Yaa sael a nr seir nr bei a mel, Zidu nia leil jiuxl teixl lei a nga arddeir a. Zidu nia leil jiuxl a mel, xiaxr var piu sae mel sser dae nr nga a nei, yar armael ddei sirnilni mel sser dae arddeir a. Yar ddei sirnilni ddei mel naxrcixl zzir ddei nga a. Zidu mel dder cirdoxr lei botaddu nr zza, cirdoxr lei no-nr-ddexr dae yassor sael a nga. <sup>20</sup> Azo lei nr coxl seir dder Arbosobo Zidu leil tiur har dae ho a; nael nia leil weix a, nixixl maelele eil ddei gga ci a saelnei ca leil mia lol. <sup>21</sup> Nia Zidu leil koxl dae a, Arbosobo leil ddarzzi a. Arbosobo mel dder Zidu si a yoxl yar leil gol du xixl lei lol, halae yar leil middux lol su ddei nga a. Yel nia Arbosobo leil ddarzzi, halae yar bbeix har zaxr dae mel sael a bei loxia.

<sup>22</sup> Nia mel Arbosobo ddei ddarzi mel leil noni a, armael leil seibeix lol ho a. Yel nia arzzi-nimar arzzi-nimo leil perniar a mel perniar laexl nr nga a nei, yarzi perniar. Nia nixmox zzar lei zzicarzzi leil yarzi sael perniar nia. <sup>23</sup> Nia leil mel zeixleixr ar boxl xiu teixl lei a,<sup>a</sup> hherdder nia cirse-cirsil si nr var olga sixl ar ddei zza a. Olga sixl eil ddei mel Arbosobo ddei ddar mel nia leil zza lol arddeir a. Yar ddei ddar mel zzae nr var silmo mel sael a loxr nr var, cirse-cirsil lei zza dae. <sup>24</sup> Arbosobo Ddei Sul ber leil bbeix:

“Ca cirddeir-hanga lei silbbar sael a nga;  
yaa ddei naxrcixl zzir hal mel lei vixlux yir sael a nga;

---

<sup>a</sup>**1:23** *Nia leil mel zeixleixr ar boxl xiu teixl lei a* Yuehal Sul 3:1-21 leil biar dae.

silbbar mel mel hie zzu var; vixlux mel lei veixsixl var;

<sup>25</sup> nael Seirpor ddei ddar mel cirse-cirsil lei zza doxr dae,”

eine bbeix a.

Ddar eil mel mel Yisu Zidu leil biar dae, si nia leil biar gger ddar seirseir hal mel nga a.

## 2

<sup>1</sup> Yel nia ca leil nr seir bei, ca leil fur, ca seir bei laexl, ca leil nixnox, ca leil bbeix vuxryixr, cirza-hanga nr seir eil mel bei nr ddo. <sup>2-3</sup> Nia mel Seirpor nia leil arsaesael perniar saexl ho a, nia dder anix bexlelte mel baxr sixl mel sael a, Arbosobo ddei ddar mel noni meixr nia. Nia leil jiuxl wo ho a, yel nia ho bei ho Yisu leil ddarzzi dax, ho bei ho yar dax bei mae dae.

### **Yisu Mel Dder Olga Zza Legelbbe Taex Yisu Leil Ddarzzi Su Mel Dder Arbosobo Ddei Cassor-worssor**

<sup>4</sup> Seirpor Yisu mel xi giexrluxl gga zoxlyoxl zzir legelbbe taex sael a nga; yar olga zza legelbbe taex nga a. Ca cirmelmel a yar leil piar pixl gger, nael Arbosobo yar leil tiur teixl lei a. Arbosobo meixddurga gga yar zoxlyoxl zzir legelbbe taex nga a. <sup>5</sup> Nia Seirpor leil ddarzzi a mel, nia lei olga zza legelbbe mel sael a nga. Arbosobo nia leil yar ddei Xiu ddei hher ggie xi loxr lol a. Nia mel xi zzir gga Arbosobo leil zi su seirceix-seirmaer ca hal mel nga a. Nia Arbosobo ddei Xiu ddei leil koxl dae a Arbosobo leil zi a mel, Arbosobo Yisu Zidu leil i dae a nia yar leil zi dae mel li var.

<sup>6</sup> Arbosobo Ddei Sul ber leil Arbosobo bbeix:

“I ddo a, ngo legelbbe zoxlyoxl zzir ar taex tiur teixl lei a,

Xi'a zzi<sup>b</sup> gga sser gex dae ho a.  
Ha yar leil ddarzzi su ca mel dder zeixleixr lei seixlda nr var.”<sup>c</sup>

<sup>7</sup> Yel nia Seirpor Yisu leil ddarzzi su ca mel dax bbeix ci a mel, legelbbe hal taex mel zoxlyoxl zzir taex nga a. Nael ddar-nr-zzi su ca mel dax bbeix ci a mel:

“Sixrjiuxr xi ax su ca mel piar pixl gger legelbbe hal taex mel,  
xi giexrluxl gga sixrjiuxr leil zoxlyoxl zzir legelbbe taex loxr ho a.”<sup>d</sup>

<sup>8</sup> Arbosobo Ddei Sul ber leil yoxl bbeix:

“Legelbbe hal taex mel ca leil baxl guirle gger;  
cidir zuax lol hal taex nga a,”<sup>e</sup>

eine bbeix a.

Ca armel a yar ddei ddarzi mel leil no-nr-ni a, legelbbe hal taex dder yaa leil baxl guirle gger. Eil ddei mel Arbosobo arddol-cirsil dder dixl har ho a.

<sup>9</sup> Nael nia mel Arbosobo tiur har dae ca cuxr nga a; nia yoxl zzirmar Arbosobo ddei leil zi su ca mel nga a; Arbosobo ddei goxr gga seirceix-seirmaer ca mel nga a; Arbosobo ddei cassor-worssor mel nga a. Arbosobo nia leil neixmar ggie hier teixl lei a, yar dax bbele ggie hier dil a, nia yar murgurgurmo bei dae eil mel ca leil biar gger ssi. <sup>10</sup> Halleix nia Arbosobo ddei cassor-worssor nr nga, nael eilboxl mel Arbosobo ddei

---

<sup>b</sup>2:6 *Xi'a zzi* Xi'a zzi mel dder Yiluxlsaler zzi ddei nga a.

<sup>c</sup>2:6 Yirsaexlyal Sul 28:16 leil vaexr dae.

<sup>d</sup>2:7 Sipi Sul 118:22 leil vaexr dae.

<sup>e</sup>2:8 Yirsaexlyal Sul 8:14 leil vaexr dae.

cassor-worssor nga ho a; halleix Arbosobo nia leil zoxlnixr mel, nia lixr-nr-cixr, nael eilboxl nia lixrcixr a.

<sup>11</sup> Ngo perniar dae arzzi-nimar arzzi-nimo mel, ngo nia leil bbeix gger: nia middurbbor nixixl goxr dae car a mel, ngolhher dae lalnga. Nia mel hherdder mi ddei cual ssi su ca mel sael a nga. Yel ngo nia leil quex, nia cirza-hanga nr seir bei ssi niazzi dae hal mel nia bei ssi nr ddo. Nia eil mel bei ssi a mel, nia ddei nixmox ddei leil yarzi sael nr seir. <sup>12</sup> Nia Yisu leil ddar-nr-zzi su ca mel dax cirgo a goxr dae a mel, cirza-hanga lei hazzi bei seir nia. Yel nia leil bbeix no su ca nei nia leil bei nr hoxr bota su ca hal mel leil nia seirseir bei dae mel leil mia lol. Eine nga a mel, Seirpor Yisu jjixr lei hal cir ni ci a, yaa dder Arbosobo leil middux lol var.

### **Vaervaerpor Mel Ddei Ddar No Nia**

<sup>13-15</sup> Arbosobo xiar dae ddei mel dder nia azo bei lei seirseir bei a, ngazi nga-nr-zi lei nr saexl nrbba nrbba bbeix su ca mel leil bbeixddu nr zza lol. Yel nia Seirpor leil weix a, nia dax halmaex quexrlixl zza su mel ddei ddar no nia. Yaa mel hherdder nia ddei zzirmar nei vaervaerpor mel nga a. Vaervaerpor eil mel zzirmar miardal si lei a nia bei cox a nia leil faxr su nei nia bei seir a nia leil kuar gger su mel nga a. <sup>16</sup> Nia azo bei lei armael lozza bbeixarnar, nael zuixl bei ssi nr ddo, nia Arbosobo leil visser su bei nia. <sup>17</sup> Ca cirddeir-hanga leil lei i du nia; Yisu leil ddarzzi su arzzi-nimar arzzi-nimo mel leil perniar nia; Arbosobo leil gexr nia; zzirmar mel leil i du nia.

<sup>18</sup> Nia zebol mu su mel, armael ddei seirpor leil i du nia, yaa ddei ddar no nia. Nia leil perniar nei ddar te a norlixlix a te su seirpor hal mel ddei ddar lar noni nr nga a nei, yarzi wo seirpor hal mel ddei ddar lei noni nia.

<sup>19</sup> Nia Arbosobo leil ddarzzi a, nia goxr sol mi-nr-bbe hal mel pex dae a lei sser gex dae a mel, Arbosobo dder nia leil seir lol var. <sup>20</sup> Nia bei cox a, si nia leil deil a, sser gex dae lalnga a mel, nia azo ar ddei kuar ddu zza

bbeixleir? Nia seirseir bei dae a, goxr sol mi-nr-bbe hal mel pex dae a lei nia sser gex dae a larnei, Arbosobo nia leil seir lol var.<sup>21</sup> Zidu nia leil weix a goxrsol-goxrnaxr mel goxr a, nia leil arsae bei nia mul gger a mel hherdder nia leil yar ssi goxr jjiumo zex leil ssi lol niazzir a nga arddeir a. Arbosobo nia leil tiur teixl lei a lei hherdder eil ddei leil weix a nga arddeir a.

<sup>22</sup> Zidu mel zuixl bei nr goxr, ca fur nr goxr.<sup>f</sup>

<sup>23</sup> Si yar leil hie vuxryixr a lei, yar si leil hie koxl nr xixl; si yar leil deil yar leil ci a lei, yar si leil nr zux. Yar mel bbaehhexhhex-arla ca leil serpaxl su Arbosobo ddei leil xia dae a, yar leil beijjiu lol.<sup>24</sup> Yar armael ddei ggecir sser a, niul ddei zuixl mel bber si a, sixrzixljiaxl leil si a. Si yar leil deil no gger a, yar dder niul leil ggukor gger a. Yar eine bei a mel niul leil zeixleixr zuixl bei lol nia-nr-zzir, seirseir bei lol niazzir a nga arddeir a.<sup>25</sup> Halleix nia mel jjiumo ssi pixl dae ya hal mel sael a nga, nael eilleix mel nia leil guaxr su ddei dax jjixr ci ho a. Yar mel hherdder yaloxlmo sael a nga.

### 3

#### Capor Nei Maerssor

<sup>1-2</sup> Nia maerssor bei su mel, armael capor ddei ddar no nia. Eine nga a mel, nia ddei capor mel cirddeirddeir a Arbosobo ddei ddarzi mel leil ddar-nr-zzi arddeirnga a lei, nael yaa armael maerssor ddei cirza-hanga lei yarzi bei seir bei dae, halae Arbosobo leil i du yar leil gexr mia a, yaa dder ddarzzi var, nia azo ddar lei bbeix nr ssa.<sup>3</sup> Nia olce pir, piu sae

---

<sup>f</sup>2:22 Yirsaexlyal Sul 53:9 leil vaexr dae.

ddexr nei pia naxrcixlcixlmo hal mel veixr a mel gel zae arnar, nix nr zae.

<sup>4</sup> Nia nr col, yarzi gayo. Eine nga a mel, nixmox zzar<sup>9</sup> lei zae dae a.

Arbosobo zzir dae a eil mel sael bei a mel dder seir zzir ddei nga a.

<sup>5</sup> Halleix Arbosobo dax bei mae su ssormaer hal mel lei eil mel sael a bei a armael leil zae dax lol, yaa halae armael capor ddar no. <sup>6</sup> Hherdder Sala yar capor Yalboxrlahar ddei ddar no a, yar leil “seirpor” ae sael a nga. Nia azo bei lei seirseir bei dae a, azo lei gexr ddu nr zza a mel, nia dder Sala ddei ssormaer loxr a.

<sup>7</sup> Ciryoxr a nga, nia capor bei su mel, armael maerssor dax cirgo a nixixl goxr a mel yar leil perniar nia. Yar mel bir nia leil naexlbix. Yar lei nia dax ciryoxr a Arbosobo dax olga sixl li wo ho a, yel nia yar leil i du nia. Eine nga a mel, nia Arbosobo dax ddar biar a, yar dder nia leil noni var.

### Yisu Leil Ddarzzi Su Mel Goxr Sol Var

<sup>8</sup> Hherdder bbeix: nia maelmaerjjia zzicarzzi dax toltor a bei nia, ca leil zoxlnixr nia, zzicarzzi leil arzzi-nimar arzzi-nimo sael a perniar nia, nixmox nor nia, col nr ddo. <sup>9</sup> Si nia leil nr seir bei a, nia dder si leil nr seir bei koxl xixl nr ddo. Si nia leil hie no a, nia dder si leil hie no xixl nr ddo. Arbosobo nia leil tiur teixl lei a mel, nia leil seir lol niazzir a nga arddeir a; yel si nia leil nr seir bei a lei, nia doxgoxleixr si leil seir lol nia.

<sup>10</sup> Arbosobo Ddei Sul ber leil bbeix:

“Arseir armael leil olga si lol niazzir,  
nixixl goxr seir niazzir arddeirnga a mel,  
yar dder armael lo ddei leil ddar nr seir hal mel te lol nr ddo,  
armael ddei meir qier leil ca fur lol nr ddo.

---

<sup>9</sup>3:4 *nixmox zzar* Xilaxl ddar bbeix “xiu.”



<sup>11-12</sup> Bei seir gaxzi su ca mel Seirpor yaa leil guaxr dae,  
Seirpor halae yaa yar dax ddar biar dae mel leil noni.

Nr seir bei su ca mel nael, Arbosobo yaa leil dir.

Yel nia leil nr seir bei lol hal mel pex dae a mel pa lalddo,  
seirseir mel lar bei ssi ddo.

Nixmox zzar arseir dax lei toltor a bei,  
eine xiar ji dae nia.”<sup>h</sup>

<sup>13</sup> Nia zabbar seirseir a seirseir bei dae arddeirnga a mel, arseir nia leil ke var bbeixleir? <sup>14</sup> Nael nia seirseir hal mel bei ssi a goxr sol arddeirnga a mel, Arbosobo nia leil seir lol a. Si nia leil zux a lei nia gexr nr ssa, nixmox zzar lei zzilzzil-zzerzzer zza nr ssa. <sup>15</sup> Nia nixmox zzar Seirpor Zidu leil i du nia, gexr nia. Ca mel nia leil nia arsaenga a Zidu leil ddarzzi biex arddeirnga a, nia arddolcar lei arsae ddarkoxl nia xiar har dae nia. Nael nia ddarkoxl car a, col nr ddo, si leil i du nia. <sup>16</sup> Nia eine bei a mel dder armael nixmox taex dax yixrsixr nr zza, zza nr var. Yel nia leil bbeix vuxryixr su ca mel leil nei nia Zidu leil ddarzzi a seirseir bei dae mel leil nrbba nrbba bbeix su ca hal mel leil armael ddei armael lei yixrsixr nr zza lol. <sup>17-18</sup> Zidu mel zuixl nr zza. Yar niul zuixl zza su ca mel dirtu si ssi a. Yar cir boxl lar si a dder niul leil jiuxl xixl lei a. Yar zeixleixr lei si nr ssa. Yar eine bei a mel dder niul leil Arbosobo dax seir xixl lol niazzir a nga arddeir a. Si yar leil ggecir ddei bei zil gger bbeixarnar, yar ddei xiu ddei mel gol dae seir. Yel niul Yisu sael a Arbosobo xiar ji dae seirseir mel bei ssi a goxr sol arddeirnga a, bir niul nr seir bei ssi a goxr sol mel leil seir leixl. <sup>19</sup> Zidu mel yijie gga ge ji dae xiu hal mel leil Arbosobo ddei ddar biar gger ssi. <sup>20</sup> Xiu hal mel mel dder Noxryal mi ca hal ddei gol dae seir car, Arbosobo ddei ddar no-nr-ni su

---

<sup>h</sup>3:11-12 Sipi Sul 34:12-16 leil vaexr dae.

ca hal mel nga a. Yar cuaxr bei halleix Arbosobo mel yaa leil xia doxr dae a huixrsoxr lol niazzir, nael giedae ci a worpe-vilax a, cuaxr gga ddir a gol zei lei su ca mel Noxryal jiujiu lei heixller lar zza.<sup>i 21</sup> Ajjix eil mel hherdder ca leil sexlsir dae sael a nga. Nia sexlsir a mel ggecir leil sei-nr-beix mel cir xia gger nr nga a nei, nia leil nixmox zzar seibeixbeix arla nga lol arddeir a. Yisu Zidu si a yoxl gol du xixl lei a, nia yar bei dae mel leil koxl dae a, nia leil mel jiuxl wo ho a. Yel nia Arbosobo meixsaer qier leil hher dae car, nia dder yar dax yixrsixr nr zza, zza nr var a.<sup>22</sup> Eilcar a Yisu Zidu mel Merhhexr ddei goxr gga hher dae ho a. Yar Arbosobo yo piar a gga cux dae a, merlabbor middurbbor quexrlixl zza nei ddoddomo bei var tisir mel leil nei neir mel leil guaxr dae.

## 4

### Arbosobo Leil Weix A Gol Dae

<sup>1</sup> Zidu mel goxrsol-goxrnaxr goxr goxr a, yel nia dder yar sael a goxrsol-goxrnaxr mel pex dae lei sser gex doxr dae nia, yar dax ciryoxr xiar nia. Arseir cirza-hanga goxrsol-goxrnaxr eil mel goxr a mel, yar dder zuixl bei zei si nr var. <sup>2</sup> Eine nga a mel, yar nixixl goxr dae car a dder nr seir xiar dae hal mel bei ssi nr var, Arbosobo miardal dae mel lar bei ssi. <sup>3</sup> Halleix nia mel gaxggor pixl dae lalnga, halae Yisu leil ddar-nr-zzi su ca mel bei meixr hal mel bei, zzicarzzi dax kerjiar, capor maerssor nr loxr seir dder zzi dax naer, nixmox zzar nr seir xiar du lei a dder bei ssi, zzibbaer ddayixr, zzorji-ddaji aexyixr-aexba ho a dder buxlguaxr-laxlsixr bei, yarzi vuxryixrddo bbex hal mel leil zi. <sup>4</sup> Eilleix nia nixixl goxr a, yaa sael a azo nr seir bei niazzir dder nr bei ssi, armael leil guaxr ssei xie a. Yel yaa zzir dae a yarzi murgur a dder nia leil bbeix

---

<sup>i</sup>3:20 Cuaxlsixljil Sul 6 nei 7 leil i cexr.

vuxryixr. <sup>5</sup> Nael arddolcar ci a mel, yaa bei dae maelmaerjjia arsaebeilei Arbosobo meixsaer qier leil biar teixl lei nia, kerzi dae nr cexr. Arbosobo mel gol dae ca mel leil nei si ho ca mel leil serpaxl su ddei nga a.

<sup>6</sup> Hherdder eine nga a, Yisu leil biar dae ddar seirseir mel ca si ho mel leil biar gger a. Arbosobo mel yaa leil ser a yaa ggecir ddei si bbeixarnar, nael yaa ddarzzi arddeirnga a, yaa ddei xiu ddei Arbosobo dax cirgo a gol dae cexr.

<sup>7</sup> Nixixl maelele ddei mel cirleixr dder ci du a. Yel nia Arbosobo dax ddar biar a mel, azo lei seirseir a xiar nia, armael leil guaxr ssei xie nia.

<sup>8</sup> Nia zzicarzzi leil perniar a mel, kebal ca ddei zuixl mel leil ssoxrsuxl a, yar ddei zuixl mel leil hol lei hol-nr-cir, yel nia zzicarzzi leil yarzi sael perniar nia. Eil ddei mel zoxlyoxl zzir ddei nga a. <sup>9</sup> Nia zzicarzzi leil

zabbar seirseir a hexl nia, boxyox nr ddo. <sup>10</sup> Arbosobo mel nia ca cirddeir-hanga leil lei bbesur gger goxr a. Yel nia armael ddei bbesur

mel zabbar seirseir a sser nia, zzicarzzi leil visser nia. <sup>11</sup> Arseir Arbosobo ddei ddar ca leil biar gger arddeirnga a mel, yar dder Arbosobo ddei

ddar mel dax zox dae a biar nia. Arseir ca leil visser arddeirnga a, yar dder Arbosobo yar leil bbesur gger mel dax zox dae a zabbar seirseir a

visser nia. Yel yaa bei dae cirza-hanga lei Yisu Zidu leil koxl dae a, Arbosobo leil middux lol. Arbosobo leil cirse-cirsil lei quexrlixl zza lol nia,

middux lol nia. Amae!

### **Yisu Leil Ddarzzi Su Mel Goxr Sol Nia**

<sup>12</sup> Ngo perniar dae arzzi-nimar arzzi-nimo mel, nia cirza-hanga goxrsol-goxrnaxr hal mel pex dae a, murgur nr ssa. Giel arsaenga a eil mel pex dae leir zzir nr ssa. <sup>13</sup> Doxgoxleixr nia Zidu dax cirgo a goxr sol

wo ddo a ggeese nia. Eine nga a mel, yar bbobbolbbo jjixr lei a, nia leil mia lol halcar a, nia nixmox zzar gielgiel yarzi sael ggeese var. <sup>14</sup> Nia Zidu

leil weix a si nia leil hie vuxryixr a mel, Arbosobo nia leil seir lol a;

hherdder bbobbolbbo Arbosobo ddei Xiu ddei nia dax hher ji dae a.

<sup>15</sup> Nael nia ca seixl, zzaegu ker, kebal zuixl bei ssi, bbeixsael si ddei azo lerler guaxr meixr a goxr sol a mel ggese nia nr nga a nei, seixlda nia.

<sup>16</sup> Nia Zidu leil weix a, goxrsol-goxrnaxr mel pex dae arddeirnga a nael, seixlda nia nr nga a nei, Arbosobo leil bbeix zae gger nia. <sup>17</sup> Arbosobo ca leil serpaxl nixixl ddei ci ho a. Yar mel hoba yar ddei ssormine, hherdder yar leil ddarzzi su mel leil serpaxl. Arbosobo niul leil hoba serpaxl arddeirnga a, halmel Yisu Zidu leil biar dae ddar seirseir mel leil ddar-nr-zzi su ca mel arsaesael nga var neil? <sup>18</sup> Arbosobo Ddei Sul ber leil vaexr dae a bbeix:

“Arbosobo dax bei mae su mel leil lei einezeixl jiuxl wo sol mel,  
Arbosobo dax bei nr mae zuixl bei su hal mel leil  
yoxl arsae jiuxl wo ddo bbeixleir?”<sup>j</sup>

<sup>19</sup> Cirza-hanga bei teixl lei su Arbosobo mel arsae bbeix ci mel dder arsae bei ci. Yel niul Arbosobo xiar dae mel sael a bei ssi a, goxr sol su ca mel armael leil Arbosobo leil jia ji gger gaxzi nia, arddolcar lei zabbar seirseir a seirseir hal mel bei doxr dae nia.

## 5

### Jiaxlhuixl Gga Ca Leil Guaxr Su Camar Nei Leixlsu Mel Leil Quex

<sup>1</sup> Ngo mel jiaxlhuixl gga ca leil guaxr su camar ar ddei a. Ngo, Zidu goxrsol-goxrnaxr ggie malma mia goxr a; ngo mia goxr mel ngo ca leil biar gger. Arddolcar a, ngo halae Zidu dax cirgo a bbobbolbbo zza var. Ngo nia ca mel gga ngo sael a ca leil guaxr su camar bei dae hal mel leil

---

<sup>j</sup>4:18 Zeyixr Sul 11:31 leil vaexr dae.

quex: <sup>2</sup> Nia zabbar seirseir a Arbosobo nia leil jia gger goxr ya mel leil loxl dae nia;<sup>k</sup> Arbosobo xiar dae mel sael a, zabbar seirseir a yaa leil guaxr dae nia. Nia nr bei goxr nr ddo a bei nr nga a nei, ggegge-sese a bei ssi nia. Zzirbae tuxr a bei dae nr nga a nei, bei ggeese a bei ssi nia. <sup>3</sup> Nia ddei quexrlixl mel sser a ddoddo-nrddo ya mel leil guaxr gex dae nr nga a nei, azo bei lei seirseir bei a, yaa leil nia leil i dae a, nia dax bei mae dae lol nia. <sup>4</sup> Eine nga a mel yaloxlmo vaer zzir ddei<sup>l</sup> jjixr lei halcar ci a, nia dder cirse-cirsil lei xiaxr nr var oldde leil ddexrlabox bbobbolbbo hal ddei li wo ddo a.

<sup>5</sup> Ciryoxr a nga, nia koxltor ye su mel koxltor vaer su mel ddar no nia. Arbosobo Ddei Sul ber leil bbeix:

“Arbosobo mel col su ca mel leil nael dir,  
nr col su ca mel leil nael  
cirza-hanga seirseir cirke meixl gger,”<sup>m</sup>

eine bbeix a.

Yel nia cirddeir-hanga lei cirdoxr lei col nr ddo, zzicarzzi leil visser nia. <sup>6</sup> Nia halae Arbosobo meixsaer qier leil col nr ddo. Arbosobo ca mel leil nia leil i du lol zi ci a mel, yar i du lol var. <sup>7</sup> Arbosobo mel nia leil yarzi perniar, yel nia cirza-hanga zoxrzixr ddu hal mel yar leil jia gger a dder ddo a.

---

<sup>k</sup>5:2 Ya mel dder Yisu leil ddarzzi su mel nga a. Ddar eil qier ddei yilsi mel dder jiaxlhuixl gga ca leil guaxr su camar mel jiaxlhuixl gga ca mel leil zabbar seirseir a guaxr nia, mul gger nia.

<sup>l</sup>5:4 *yaloxlmo vaer zzir ddei* Yaloxlmo vaer zzir ddei mel dder Yisu nga a.

<sup>m</sup>5:5 Zeyixr Sul 3:34 leil vaexr dae.

<sup>8</sup> Nia leil vuxryixr su neir zzirmar te mel, hhemar sael a bbialil-bbialor me dae a, ssicixl-ssige ca leil zo a, yaa leil ke niazzir. Yel nia fadae nia, armael leil guaxr ssei xie nia! <sup>9</sup> Nia lei saexl, middurbbor Seirpor Yisu leil ddarzzi su arzzi-nimar arzzi-nimo mel lei nia sael a goxr sol dae, yel nia nixmox zzar Yisu Zidu leil velper a ddarzzi doxr dae a, neir zzirmar te leil dir gex dae nia.

<sup>10</sup> Nia leil cirza-hanga seirseir meixl gger su Arbosobo nia leil tiur a, Yisu Zidu leil koxl dae a cirse-cirsil lei yar sael a bbobbolbbo zza lol. Nia goxrsol-goxrnaxr goxr dae eil mel mel cirleixr a nga, yar arsaebeilei nia leil nixmox ddei hhel du xixl lei lol var, nia leil warni lol var, nia leil nixmox zzar Yisu Zidu leil velper a ddarzzi doxr dae lol var. <sup>11</sup> Arbosobo leil mel cirse-cirsil lei quexrlixl zza lol nia. Amae!

### **Zzasoso Dae Biex**

<sup>12</sup> Ngo ddei arzzi-nimar Xila mel koxl ssei ddo ca ar ddei a. Ngua nnel nia leil xil vaexr gger a nia leil quex, halae Arbosobo niul leil cirza-hanga seirseir meixl gger dae eil mel yarzi a nia leil biar gger. Nia eil mel leil koxl dae a, zabbar seirseir a Arbosobo leil ddarzzi doxr dae nia.

<sup>13</sup> Babirluixr zzi gga Yisu leil ddarzzi su ca mel lei nia leil zzasoso dae biex dae. Arbosobo yaa leil nia dax cirter a tiur teixl lei a. Ngo ssor Marker lei nia leil zzasoso dae biex dae. <sup>14</sup> Nia lei zzicarzzi leil perniar a, zzi leil zzasoso dae biex nia ngor! Nia Zidu leil ddarzzi su ca mel cirddeir-hanga Arbosobo nia leil nixmox zzaso lol nia!